

LIS PREDICJIS DAL MUINI

di pre Josef Marchet - Udin, 1965

La patrie

Blasin dal Ros, la jù, che al è un omenut di chei che ur plâs di stâ in buinis cun ducj - cui drets e cui sturats, cui svelts e cui gnognos, cul Signôr e cul diambar - al mi à fermât pe strade, za dîs, e al mi à fat un resonament di cheste fate: "Vô, Vigjat, - dissal - o vês une lengate: no passe une sabide che no spudais cualchi sclip di velen daprûf di cualchidun. Par vô, Gargagnà di 'Sore al è un paîs cjamât di dutis lis inicitâts: un paîs plen di canaiatis, di massepassûts, di imbroions, di cjochelis, di galeris, di barbars, di maleducâts, di cjastrons, di madracs, di robate di ogni sete. Di just o sês nome vô e nissun altri! Come se Lupignan e Glerean e Cjistielgrant e San Blâs e Vilelargje e Cumugnins o chei altris paisuts culî dongje a fossin fats di farine di flôr! Ancje se e fos vere, no us stâ a vô, che o sês nassût e cressût culî, di meti a mâl il vuestri paîs. No indi disino avonde cuintri di nô i nestrîs confinants? Si à di puartâ la patrie, e la patrie e scomence tal paîs dulà che si è nassûts...".

Oh mo! Za fa trê agns, cuant che Zuanut di Beorcje e Puelit Croste ti menarin vie la vidiele de stale, Blasin, e ti netarin il camarin di dute la robe porcine, tu no tu finivis plui di zirâ di une ostarie in chê altre sberghelant che chest al è il paîs dai laris, dai lazarons, des ligjeris, dai delincuentes. Ma se no ti tocjin te, a son ducj galantoms. A mi nissun mi à mai puartât vie nuie, alore o sarès in dovê di fevelâ nome ben dai miei paisans: par vie dal amôr di patrie, no mo, Blasin? Ma di chei di Lupignan e di San Blâs e di Cumugnins, di chei sî che Blasin mi permet di fevelâ malementri: anzit o fasarès une opare buine a sputanâju. Sint mo, Blasin: se jo no volès ben al gno paîs, mi infotarès des sôs tristeriis e des sôs cragnis. E se cualchidun cualchi volte nol met il dêt su la plaie, cui che al è implaiât salacor no si vise e no si cure. Chei di Lupignan e di Glerean e di Vilelargje no son culî a sintîmi ni di sabide ni di domenie, e alore ce costrut saressial a slengâju par daûr? Jo no dîs ni che a son di miôr ni che a son di piês: o dîs ce che a son chei di culî, che mi sintin, cu la sperance che a butâur in muse lis lôr rognis al zovi par che si mendin. Se o vessin culî almancul un fregul di capelan che al cognossès pulît ce plumis che o sin, o lassarès che al fevelàs e che al si distrigàs lui: ma chel biât pre 'Scjefin che al rive sù sfladassant une volte par setemane, o nancje chê, ce puèdial savê? E ce puèdial dî, che nol rive adore di meti cuatri peraulis in file, cun chel talian scrocât che al vûl fevelâ? E alore o feveli jo: come che o sai e come che o pues, in bon furlan. O feveli sclet come che al va fevelât cun int di piel dure, che no capîs delicatecis. O feveli cun chel fregul di esperience che o ai imparade ator pal mont par tancj agns. O feveli a fin di ben, parcè che mi

plasarès di viodi intor di me un pocje di plui onestât e di plui gnuche. No dîs nome mâl: dutis chês voltis che o pues dî ben, lu dîs vultintîr; e se chês voltis a son raris no soi colpe jo. E no pratint di jessi cence pecjis: si sa che lis mêș pecjis jo no lis viôt, e voaltris lis viodêș dutis: se cualchidun mi jude a cognossilis, i al varai agrât.

Ma il resonament di Blasin dal Ros sul amôr di patrie, che si à di dî simpri ben dai paisans e mâl dai forescj, nol è un resonament furlan!

Mi dismenteavi di visâ che doman e je messe aes vot e funzion nuie. E cun cheste us doi la buine sere.